

Date – 21/05/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Village Council Hmeichhe member te Inkhawmpui hmasa ber chu vawiin khan Aizawl Vanapa Hall-ah hman a ni.
2. Ramchung hmun dang ang bawkin Mizoramah pawh indo denchhena inrenchemna kalpui a ni.
3. India leh Italy chuan India-Middle East-Europe Economic Corridor (IMEC) tih changtlun an remti.
4. Sawrar laipui chuan hmel tihthat nana cosmetic thil injection hman a khap.



CONVENTION FOR WOMEN VC

Village Council Hmeichhe member te Inkhawmpui hmasa ber chu vawiin khan Aizawl Vanapa Hall-ah hman a ni a, Health Minister Pi Lalrinpuiin a hmanpui.

Thusawiin Pi Lalrinpuii chuan, ram pum thlir chuan hmeichhe dinhmun a sang lo thin a, tunah chuan khawsak phung mai bakah Politics huangah pawh hmasawna a nasa a - Mizoram in hmeichhe Cabinet Minister a nei ta hial chu chhinchhiah tlak a ni a ti.

Pi Lalrinpuii chuan hmeichhe dinhmun a san chhoh ve tak rual chiahin mawhphurhna a sang ve nghal tih a sawi a. Mahni hna leh chanvo hrechiang a, hmeichhe VC te chu thutkhawm pawimawhah te mahni ngaihndan thawh a, ngaihtuahna seng takzet turin a chah bawk a ni.

(Byte: Pi Lalrinpuii)

He huna thu sawitu dang West Tuipui bialtu MLA Pi Prova Chakma chuan hmeichhia te chu inchhung khura awm tam an nih avangin fa te enkawl that kawngah mawhphurhna an nei sang tih a sawi a, hemi rual hian ram rorelna kawngah pawh dinhmun pawimawh luantu an ni tih a sawi bawk.

Aizawl South III bialtu MLA Pi Baryl Vanneihsangi pawhin thu sawiin, hmasawna hna tha taka thawk tur chuan Minister leh MLA te chauh ni loin am

biala VC ten an lo thlawp that a pawimawh tih a sawi a, tanrual chuan thil harsa leh theih loh anga ngaih te pawh a tih theih thin tih a sawi a ni.

Tun dinhmunah Mizoram pumah hmeichhe VC member 908 an awm mek a ni.

<><><>

HEROIN SEIZED

Cheng vbc 4 leh nuai 98 hu heroin Saitual DEF Special Team ten an man a,

Special Team hian zan laiah Keifang khaw pawnah lirthei an endik a, Manipur atanga Aizawl pana kal lirthei pakhat ti dingin, kum tling lo, kum 15 mi khalh a ni a. Rinhlelh thilah uluk taka endik niin, Bolero chung a hnung seat siam danglam bikah thuhruk taka dah sahbawn bawm 210 -ah heroin kg 2.493 man chhuah a ni.

Naupang chungchangah hian dan anga hma lak a ni a, a nu hnenah mobile phone hmangin hriattirna pawh pek nghal a ni bawk. An motor hmante leh mobile phone hmante chu man a ni.

He case-ah hian midang inhnamhnawih te hriat chhuah a nih theih nan hnu chhui hna kalpui zui zel a ni.

<><><>

RD MINISTER

Rural Development Minister Prof Lalnilawman vawiin khan Selingah Artui a Intodelh tura Bana Kaih Project a hawng a, he hunah hian Prof Lalnilawma chuan Mizoram state pawn atangin artui a lalut nasa tih a sawi a, tualchhung atanga artui tam zawk neih theih nan hmalak a ni tih a sawi bawk.

Ar vultu tur te chu Ar in sakna tur Rangva pek an ni a. Ar note man zaa 75 chu MLA Fund atangin zaa 25 chu beneficiaries in an tum dawn a ni. Ar chaw man chu thla 5 chung atan zaa 75 chu MLA Fund atana pek a ni bawk ang.

RD Minister Prof Lalnilawma chuan tuna an thil tih chu a bul tanna chauh a nih thu a sawi a, mi taima, rinawm leh tumruh te bana kai turin a inpeih reng tih sawiin, a bial chung atanga artui thar chhuah tuma an beih zel tur thu a sawi bawk a ni.

<><><>

MIZO SONG COMPOSERS

Mizo Song Composers' Society chuan AI hmanga Mizo hla phuah sa lo sak tir a, lo thehdarh tawhte chu la thla leh vek turin an ngen.

Vawiina an thuchhuah tarlan danin, tunlai hian Mizo hla engemawzat, a phuahu leh neitute phalna leh hriatpuina tel miah lova Artificial Intelligence (AI) hmanga khawih danglama, YouTube leh platform dang hrang hranga dah chhuah a tam hle a, heng thil hi ti tawh lo tur leh a lo ti tawhte pawh delete nghal turin an hriattir a ni.

MSCS chuan hla phuahtute hnen atangin lungawi lohna leh hetiang thil avanga harsatna an tawh thu tam tak an dawn thin thu an sawi a. Hetianga mi hla, phalna la hmasa lova AI hmanga lo saktira thehdarh hi dan dinglai hnuaiah 'thil sual' a nih thu an tarlang bawk.

MSCS chuan hetianga lo ti tawh zawng zawngte chu a rang lama paih turin an hriattir a. A ti mek te leh ti tum an awm a nih pawhin tawpsan nghal turin an ngen a. An ngenna min zahsak lova, ti lui an awm a nih chuan dan hnuaiah hma lak a ni dawn tih an tarlang nghal bawk a ni.



AUSTERITY MEASURE

Ramchhung hmun dang ang bawkin Mizoramah pawh indo denchhena inrenchemna kalpui a ni a, vawiin khan sorkar hnathawk te pawh thuang hnih in Pisa an kal.

General Administration Department (GAD) thu chhuak angin, school leh office kal hun chu thuhmun lo deuha siam a ni a, kalkawnga traffic jam tih ziaawmna tur niin, hei hian tuialhthei hman a tih tlem theih beisei vang a ni a, kan corr chuan Aizawl khawpuiah lirthei tawt lutuk chu a ziaawm phah deuh niin a lang a ti.

Aizawl khawpui chhunga Petrol Pump thenkhatah tuialhthei lak tum intlar hmuh tur an awm a, hetih lai hian Supply Department atanga thu dawn dan chuan Oil chungchangah harsatna a awm lo a, filling station thenkhat an Oil la thleng lo khaihlahk an awm palh a ni thei bawk niin an sawi.

Akashvani News zawhna chhangin FCS&CA Department Director Pi Saizikpui chuan, tuialhthei chungchangah harsatna a awm lo a. Buhfai chhekkhawl pawh a tha tawk a, thingtlang lam chauh ni lovin Aizawl khawpui tan pawh Buhfai dahkhawl a tha tawk a ni, a ti.

Sorkar thuneitu lam chuan inrenchemna hi an kalpui nghal a, chief minister leh minister te pawhin zuitu an neih chu tih tlem a ni.

Hetih lai hian Mizoram sorkar chuan tuialhthei chungchangah mipui chu inrenchem turin a chah a. Vawiin tlaia thuchhuah a siamah, Mizoram chu state pawn atanga bungraw chaw lut thin a nih avangin, ram chhunga tuialhthei man pung leh bungraw phurh man pung hian a nghawng nghal lo thei lo a. Heng te avang hian sawrkar sum renchem kawngah leh heng thil hlu vawn chungchangah a theih ang ang hma la turin Sawrkar chuan mipuite a ngen a ni.



HLIMEN PLAYGROUND

UD&PA minister Pu K. Sapdanga chuan Hlimen ah Aizawl Smart City Limited hnuaia sak Hlimen Football khelmual a hawng a, he khelmual hi cheng vbc10 leh nuai 65 senga sak a ni.

Hawna inkhawmah hian Pu K. Sapdanga chuan thu sawiin, Ram pumah Mizote chu football khel thiama hriat an ni a, ISL leh I-league ah te pawh player chhuanawm tak tak an awm a ti a, he hmingthatna hi chhawm nun a nih zel theihna

turin khelmual hawn thar pawh hian kawng ro tam tak a sut kuak ngei a beisei a ti a, field nuam satliah lo, thalai tam tak football lam a mi chhuanawm chher chhuaktu a lo nih a, hriselna kawngahte, mahni invawna kawngahte Hlimen khawtlang tan pawh malsawma thlen theitu a nih ngei a beisei thu a tarlang bawk a ni.

Bialtu MLA Pi Baryl Vanneihsang pawhin thu sawiin, Hlimen khawtlang tan ni chhinchhiah tlak tak a nih thu leh, khelmual hawn thar chu thalaite tan eizawna ngialnghet siam saktu a nih ngei a beisei thu a sawi bawk a ni.



MNF PR

MNF Party chuan thuchhuah siamin an party MNF Ministry-in Hlimen Playground changtlung leh rotling, harsatna hrang hrang karah playground tha an neih ngei theihna tura theihtawp a chhuah luihna zarah vawiina hawn theih a lo ni ta chu lawmawm an ti tih an sawi a. Hlimen khawtlang mipuite leh a chhehvela mipuite, a bikin thalai infiammiten an chhawr tangkai ngei theih nan leh, Mizote hming chhertu tur thalai tam tak chherchhuahna hmun a nih ngei theih nan MNF chuan duhsakna a hlan nghal a ni an ti.

Hlimen Playground bakah hian MNF Ministry huna bul tan leh thawh mek hawn theih mai tur ropui tak tak a la awm nual an ti a. Mizorama Football Stadium tha ber Durtlang Football Stadium, International Standard cheng vaibelchhe 22 hu chu March ni 17 khan hawn a lo ni tawh a. Hawn hmabak Mizo High School Field Playground (Multipurpose Ground at High Field, Zarkawt) te leh thawh mek Zemabawk Playground leh Playground hrang hrang a la awm bawk an ti.

MNF chuan heng playground leh stadium ropui tak takte hi ram mipuite leh thalai infiammiten an chhawr tangkai kim theih hun a nghakhlel em em an ti a. Project kal lai mekte pawh tha taka thawh zawh thuai a nih theih nan State Sorkar lai chu theihtawp chhuaha thawk chhunzawm turin a chah nghal an ti a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



INDIA-ITALY IMEC

India leh Italay chuan India-Middle East-Europe Economic Corridor (IMEC) tih changtlun an remti. He inremna vang hian sumdawna, sum peipunna leh supply-chain ah nasa takin hmasawna a thleng dawn tawh a. Thuchhuah intawm an siamah Prime Minister Narendra Modia leh Italian Prime Minister Giorgia Meloni te chuan India-Middle East-Europe Economic Corridor (MEC) hmanga thawhdunna nghet zawk siam an duh thu an sawi a. Khawvel sumdawna leh inkalpawhnaah he thawhdunna hian thil tha tam tak a thlen dawn tih an sawi a. IMEC chu Europe, Middle East leh India thlunzawmna kawng pawimawh tak anih thu sawiin hei hain sumdawna kawngah tangkaina tam tak a nei tih ans awi bawk a ni.



COSMETIC RULES

Sawrar laipui chuan hmel hmai tihthat nana cosmetic thil injection hman a khap. Central Drugs Standard Control Organisation (CDSCO) chuan Cosmetic thilte chu taksaa inhnawih emaw inchulh emaw inkah tura siam a ni a ti a. Cosometric bungrua siam leh rampawn atanga lakluh leh zawrhchhuah chungchang hi Cosmetic Rules 2020 hmanga khuahkhirh a ni tih a tarlang a. CDSCO chuan danin a khap thil cosmetic siam nana hmante, mipui rilru a diklo lama hruai thei tura uchuak taka infakna siamte leh injection hmanga cosmetic tih chu dan bawhchhiatna anih thu a tarlang a ni.

